

आकाशवाणी जयपुर-अजमेर
प्रादेशिक समाचार

- केन्द्र सरकार दुर्लभ अर सामरिक तौर ऊं खास खनिज पदार्था री पहला दौर री नीलामी काल सुरू करेला।
- देश मांय दिव्यांग बच्चां सारू आंगनबाडी प्रोटोकॉल रो राष्ट्रीय आउटरीच कार्यक्रम आज सुरू व्हयो।
- राज्य मांय व्ह्या विधानसभा चुनाव मांय गांवाई हलकां मांय शहरी हलका री तुलना मांय चार फीसदी बत्ता वोट पड्या।

अर

- प्रदेश रा केई हलकां मांय आज ई बिरखा व्ही-मौसम विभाग जयपुर, भरतपुर अर कोटा संभाग मांय आवता तीन दिन ऐडो ई मौसम रेहवण रा आसार जताया।

केन्द्र सरकार दुर्लभ अर सामरिक तौर ऊं खास खनिज पदार्था रा 20 समूहां री पहला दौर री नीलामी काल सुरू करेला। खनन मंत्रालय रे मुजब ऑनलाइन नीलामी रो ओ काम दो दौर मांय साफगोई सागे पूरो कर्यो जावेला। ई नीलामी मांय नवीकरणीय ऊर्जा, रक्षा, कृषि, औषधि, आला दर्जा री प्रौद्योगिकी वाळा इलेक्ट्रॉनिक्स, दूरसंचार अर परिवहन संबंधी हलकां री जरूरतां री पूर्ति करण वाळा खास खनिज पदार्थ शामिल है।

000

केंद्रीय महिला अर बाल विकास मंत्री स्मृति ईरानी आज दिव्यांग बच्चां सारू आंगनबाडी प्रोटोकॉल रा राष्ट्रीय आउटरीच कार्यक्रम री सुरूआत कीनी। ई रा तैत दिव्यांगजन रा समावेशी पोषण सारू सामाजिक मॉडल शामिल करी ज्यो है। इण मांय दिव्यांगता रा लक्षणां री सुरूआती दौर मांय जाँच, वां ने सामुदायिक कार्यक्रमां ऊं जोड़णा अर आशा अर एएनएम रा दलां रे मार्फत मदद करणो शामिल है। इण रो मकसद बच्चां रो पूरो सुधार तय करणो है। ई मौके स्मृति ईरानी कह्यो के पहली पैली दफा आंगनबाडी कार्यकर्ता दिव्यांगता री पहचान सारू बच्चां री जांच मांय मदद करेला। ईरानी कह्यो के ई कार्यक्रम ऊं हर साल कम ऊं कम एक लाख बच्चां ने फायदो मिलेला।

000

विकसित भारत संकल्प यात्रा आज दिल्ली मांय सुरू व्ही। ई यात्रा ने दिल्ली रा उपराज्यपाल विनय कुमार सक्सेना हरी झंडी बता र विहर कीनी। ई मौके उपराज्यपाल कह्यो के केन्द्र सरकार जनता रा भला सारू प्रधानमंत्री आवास योजना अर आयुष्मान भारत योजना सरीखी केई योजनावां चलायी है। वे कह्यो के ई यात्रा रो मकसद जनता रा भला सारू केन्द्र कानी ऊं चलायी ज्यी न्यारी-न्यारी योजनावां री जाणकारी जनता ने दे र वां रा बारा मांय जाण जगावणो है। ई यात्रा रा तहत सूचना अर संचार वाहन दिल्ली रा 11 जिलां री छह सौ ऊं बत्ती ठौड़ां ऊं निकळेला। प्रधानमंत्री नरेन्द्र मोदी ई महीना री 15 तारीख ने ई यात्रा री सुरूआत कीनी ही।

000

विधानसभा चुनाव सारू पड्या वोटं री 3 दिसम्बर ने करी जावण वाळी गिणती सारू राज्य रा न्यारा-न्यारा जिलां मांय तैयारियां करी जा रही है। बूंदी मांय वोटं री गिणती री ड्यूटी मांय लगायी ज्यो कर्मचारियां ने आज पहली सिखावण दीरीजी। ई दौरान जिला निर्वाचन अधिकारी डॉ. रविन्द्र गोस्वामी कर्मचारियां ने पूरी सावधानी अर सावचेती सागे वोटं री गिणती करण बाबत कह्यो। जालौर जिला मांय वोटं री गिणती सारू मतगणना पर्यवेक्षक, मतगणना सहायक अर माईक्रो ऑब्जर्वर्स ने सिखावण दीरीजी। हनुमानगढ़ मांय तीन स्तर रा हिफाजती इन्तजामात बीचे वोटं री गिणी करी

जावेला। वोटों की गिनती का दिन फौज का जवानों सागे ई पुलिस का अढ़ाई सौ कर्मचारियों को जाब्तो तैनात कर्यो जावेला। करौली का जिला निर्वाचन अधिकारी अंकित कुमार सिंह आज अहलकारों की मीटिंग ले र वोटों की गिनती ऊं जुड़या जरूरी हुकम दीना। दूजी कानी सियासी पार्टिया ई वोटों की गिनती सारू तैयारी कर रही है। भाजपा का प्रदेश अध्यक्ष सीपी जोशी पार्टी का सगळा उम्मीदवारों ने 03 दिसंबर ने करी जावण वाळी वोटों की गिनती सारू तैयार रेहवण बाबत दिशा-निर्देश जारी कीना है।

000

राज्य मांय विधानसभा चुणाव सारू 25 नवम्बर ने गांवाई हलकां मांय शहरी हलकां रे मुकाबले चार फीसदी बत्ता वोट पड़या। मुख्य निर्वाचन अधिकारी प्रवीण गुप्ता कानी ऊं दीरीजी जाणकारी रे मुजब गांवां मांय वोट देवण वाळा चार करोड ऊं बत्ता मांय ऊं तीन करोड दो लाख जणा वोट दीना। शहरा का सवा करोड ऊं बत्ता मतदातावां मांय ऊं 89 लाख 38 हजार जणा वोट दीना। शहरी हलकां मांय 71 दशमलव 23 फीसदी जद के गांवाई हलकां मांय 75 दशमलव 68 फीसदी वोट पड़या।

000

राज्य का केई हलकां मांय आज ई बिरखा रो दौर चालतो रह्यो। छांटो-छिड़को व्हेवण अर बादळा मण्ड्या रेहवण ऊं पारो उतर्यो है अर टंड रो असर बध ग्यो है। लारला 24 घंटां मांय करौली, सवाईमाधोपुर, टोंक, धौलपुर, राजसमंद, भीलवाडा, झुंझुनूं अर जयपुर जिला मांय हल्की ऊं मझला दर्जा की बिरखा व्ही। जयपुर मांय गुजरी रात अर आज दिन मांय छांटो-छिड़को व्ह्यो। बिरखा रे कारण दिन का तापमान मांय 10 डिग्री सेल्सियस तांई की गिरावट दर्ज करी ज्यी है। लारली रात पिलानी मांय न्यूनतम तापमान साढे ग्यारह डिग्री सेल्सियस दर्ज करी ज्यो। सिरौही मांय रात की बगत पारो 11 दशमलव 7 जद के चूरू मांय 11 दशमलव 9 डिग्री सेल्सियस नापी ज्यो। मौसम विभाग आज जयपुर, कोटा, भरतपुर, अजमेर, बीकानेर अर उदयपुर संभाग मांय हल्की बिरखा व्हेवण का आसार जताया है। मौसम केन्द्र जयपुर का निदेशक राधेश्याम शर्मा बतायो के जयपुर, भरतपुर अर कोटा संभाग मांय पश्चिमी विक्षोभ का असर ऊं आवता तीन दिन ऐडो ई मौसम रेहवण का आसार है।

000

सियाळा की रूत सरू व्हेवण सागे ई कोहरो व्हेवण लाग्यो है। ऐडा हालत मांय रेलगाडियां ने हिफाजत सागे चलावण सारू फॉग डिवाइस काम ली जा रही है। फिलहाल जोधपुर मण्डल की रेलगाडियां चलावण वाळां ने ओ सुबीतो मुहैया करायी ज्यो है। म्हाणा जोधपुर खबरनवीस बतायो के फॉग डिवाइस की मदद ऊं धुंअर रे कारण रेलगाडियां का हादसा व्हेवण की शंका कम व्हे जावे है अर वां रे मोड़ी चालण का आसार ई कम रेहवे है।

000

सवाईमाधोपुर जिला मांय एनीमिया मुक्त राजस्थान कार्यक्रम का तैत चिकित्सा अर स्वास्थ्य विभाग की ओर ऊं आज बच्चां, किशोर-किशोरियां, जणबा की उम्र की महिलावां, आस वाळी लुगाइयां अर दूध पावण वाळी मायडां मांय खून की कमी की रेट कम करण का मकसद ऊं शक्ति दिवस को आयोजन करी ज्यो। जिला का सगळा जिला अस्पतालां, सामुदायिक स्वास्थ्य केन्द्रां अर प्राथमिक स्वास्थ्य केन्द्रां अर हैल्थ वेलनेस सेंटरां परां नियमित ओपीडी सागे ई मरीजां का हीमोग्लोबीन की जांच कर र जरूरी जाणकारी दीरीजी। बांसवाडा मांय ई पांचवीं कक्षा तांई का बच्चां ने गुलाबी गोळी अर छठी ऊं बारहवीं कक्षा तांई का बच्चां ने नीली गोळी दीरीजी।

000

बांसवाडा मांय नुवा जन्म्या टाबरां की निमोनिया ऊं व्हेवण वाळी मौत का वाकया कम करण सारू चिकित्सा विभाग की ओर ऊं सांस अभियान चलायो जावेला। ई का तहत जनता मांय जाग जगावण सारू स्वास्थ्य विभाग का कर्मचारी जमीनी स्तर माथे फरवरी महीना तांई अभियान चलावेला। कार्यवाहक मुख्य चिकित्सा अर स्वास्थ्य अधिकारी अर आरसीएचओ डॉ. राहुल डिंडोर बतायो के 5.3 फीसदी बच्चां की मौत निमोनिया रे कारण व्हे है, जिण ने कम कर र 3 फीसदी ऊं कम करणो तय करी ज्यो है। सांस यानी सोशल अवयरनेस एंड एक्शन ऑफ न्यूट्रीलाइज न्यूम्यूनिया अभियान का तहत निमोनिया की फेंट मांय आया बच्चां को आशा रे मार्फत ईलाज करवायो जावेला।

000

बीकानेर जिला मांय पाकिस्तान ऊं लाग्योड़ी अंतर्राष्ट्रीय सरहद कने बस्योडा गांव आनंदगढ़ मांय बीएसएफ की 124 वीं बटालियन की ओर ऊं जनता सारू मुफ्त चिकित्सा शिविर लगायी ज्यो। इण मांय

करीब 400 जणा री मुफ्त स्वास्थ्य जांच करी ज्यी अर जरूरी दवाइयां मुफ्त मुहैया करायी ज्यी। बीकानेर सेक्टर हेडक्वार्टर रा डीआईजी अजय लूथरा बतायो के आगे ई सरहदी हलकां मांय ऐड़ा कार्यक्रम राख्या जावेला। आज ई सीमा चौकी नीचेवाली कने रा गांव भुरासर मांय राखी ज्या कार्यक्रम मांय बीएसएफ री ओर ऊं 24 विद्यार्थियां ने ट्रैक सूट, जूता अर भणार्ई-लिखाई रो जरूरी सामान मुहैया करायी ज्यो।

000

राष्ट्रीय खेलां मांय रोल बॉल री होड़ जीतण वाळा राजस्थान रा खिलाड़ी आज राजभवन मांय राज्यपाल कलराज मिश्र सागे मुलाकात कीनी। रोल बॉल फेडरेशन रा अध्यक्ष अर पैली वाळा आई.ए.एस. अहलकार मनोहर कांत री अगुवाई मांय खिलाड़ियां रो दल राज्यपाल सागे मुलाकाम कीनी। मिला। राज्यपाल रोल बॉल होड़ मांय सोना अर चांदी रा तमगा हासिल करण वाळी पुरुष अर महिला टीम रा सदस्यां ने बधाई देता थका वां सागे बातचीत कीनी। ई मौके राज्यपाल कह्यो के खेलां ऊं मानवीय मूल्यां अर भेळी चेतना रो विकास व्हे है।

000

इंदिरा गांधी राष्ट्रीय मुक्त विश्वविद्यालय री दिसम्बर सत्रांत परीक्षावां 1 दिसम्बर ऊं 9 जनवरी 2024 ताई चालेला। इग्नू रा जयपुर क्षेत्रीय केन्द्र री वरिष्ठ क्षेत्रीय निदेशक, डॉ. ममता भाटिया बतायो के ई इम्तिहान मांय स्नातक, स्नातकोत्तर, डिप्लोमा, पीजी डिप्लोमा अर सर्टिफिकेट कोर्स रा विद्यार्थी शामिल व्हेला। इम्तिहान देवण वाळां रा सुबीता सारू 23 परीक्षा केन्द्र बणायी ज्या है ज्यां मांय 4 परीक्षा केन्द्र जेलां मांय पढ रह्या कैदियां सारू बणायी ज्या है। परीक्षा देवण वाळा यूनिवर्सिटी री वेबसाईट ऊं प्रवेश पत्र डाउनलोड कर सके है।

000